

գիչ արեւի տակ փայլելով պղնձէ սաղաւարդներ :

Գաւառապետի ճառը :

Հողիների փայտէ բահը, որի տակ հողը մնում է կարծր եւ դիմացկուն :

Բալզակը —

— Ճշգրիտ, անփոփոխ, անողոք : Գաւառը՝ մլուկ եւ Ֆիլոքսերա :

* * *

Մարքսը, Էնգելսը : Լենինը եւ իր մահը : Ուրիշ միջավայրում վեհութիւնից ոչ գուրկ այդ արժէքները՝ կապիկների ձեռքին ընկուզի նման փշրուած են : Թամաշան, փոքրիկ մարդկանց յաւակնութիւններով պճնուած, գլուխը ծոռում, ուժասպառ ընկնում է փոշիների տակ : Նապոլիոնը, ենթադաւառապետութեան չորրորդ աստիճանի պաշտօնեայի բերանում, լաւաշի նման ծամւում է : Կեսարը խիտնջի ձայն է հանում :

Դեռ տանելի է, երբ մեծ երկրի յետամընաց մի գիւղաքաղաքում պաշտօնական տօնը փատարւում է մեքենարար, ծուլօրէն, բարձրից եկած հրամանը կատարելու համար : Գալիս են, խօսում են, գնում են : Բայց դաժան բան է, երբ կատակերգութեան ուզում են կըրօնական հանգամանք տալ : Երբ միլիցականը ուսերի վրայ փիլոն է ձգում, երբ տուրքերի հաշուապահը առաքելութեան մասին է ճառում, եւ Չեկայի լրտեսը համամարդկային երջանկութեան շեփոքն է փչում :

Մեծարարաւ նախադասութիւնների կըրակի տակ, գաւառը խլեզի նման տաքանում է եւ կարիճի նման կանդ առնում : Նենգամիտ, կեղծաւոր, նախանձոտ, նա իր ամենօրեայ լինելիութիւնը լեցնում է փոքրիկ թոյնի հաբերով, ցեխերի վրայից ցատկոտելով, մտաւոր եւ հոգեկան անկումներից իսկ ազատագրուած, պարապի ծոցին օրօրուելով :

Երէկ նա չոքում էր կաթողիկոսի առջեւ, աջը համբուրում, այսօր՝ հրացանը ձեռքին կանգնել է Լենինի լուսանկարի մօտ, ուզում է հաւատ ծախել :

Սկեպտիկ, համակերպող, վայելքի ծարաւ ու գորշ այդ մտայնութիւնը վերջ ի վերջոյ զգում է իր կեղծիքը եւ որովհետեւ զգում է՝ չարանում է :

Չարանում է : Ամէն կողմը թշնամիներ է փնտռում : Խոժոռ աչքեր է ձեւացնում, նայում է, լրտեսում է : Ուզում է երեւակայել, որ ինչ որ ծածուկ դաւադրութիւններ գոյութիւն ունեն, ինչ որ մութ շարժումներ, կասկածելի մտքերի աննշմարելի արտայայտութիւններ : Մենք կրակ ու բոցի մէջ ենք աշխատում :

Իսկ հայ ժողովուրդը, որ իսկապէս դարերով պարել է կրակ ու բոցի վրայ, որ տեսել է պարսիկ, արաբ, թուրք, ռուս, տեսել է Համիտը, Յարը —

Անցնում է՝ այսօր էլ՝ դանդաղ, ներքնապէս հանդիստ, միտքը բոլորովին ուրիշ տեղ եւ երկու մատով բարձրացնում է իր դրակը, բարեւում է, ու խորամանկ նայուածքով դիտում է հրացանը ձեռքին կանգնած երկու տիւմարներին :

Այդ էլ կ'անցնի :

Վարը, Մարքսը եւ Էնգելսը, նայում են ճերմակ աչքերով :

Կոպերի տակ փոռւած անրիբ այդ նայուածքը տարածւում է ամբողջ Երեւանի վերայ : Հովը սաստկացել է :

Ձիւնի եղանակ է :

* * *

Պատրաստութիւններ : Մեծ պատրաստութիւններ :

Բուրվարի մօտ ամբիոն են շինում : Լենինի հրապարակում գետեղում են ապագայ արձանի հիմքերը : Փոս են քանդել, քարեր են դրել՝ աղքատիկ գերեզմանի է նմանում :

Երեսասարդ բուլչեիկները տենդային գործունէութեան մէջ են : Վազում են : Կաշուէ ծրարներից թղթեր են դուրս հանում, արագ աչք նետում, մի վայրկեան մտածում ու նորից վազում :

Հեռաձայնները լայնացած ականջների մէջ անդադար զրնգում են : Ինքնաշարժները, բարձրաստիճան տէրերին լքել են ու դաւառի հեռաւոր անկիւնները մանր ապրանք են տանում :

Ժողովներ, ժողովներ :

Մեծ մի աղեղից նետը դուրս է պրծել, մտահոգ նայում են, ո՞ւր պիտի ընկնի :

Յեղափոխութեան արխիվի ամբողջ փոշին ամպի նման բարձրացել է եւ քրտնաթոր երես-